

## Gadis 'introvert' muncul pelajar terbaik Politeknik Kota Bharu

Nor Amalina Alias  
am@hmetro.com.my



Gadis 'introvert', Nurul Bazlina Zainudin, 22 diapit kedua ibubapanya, Zainudin Mat Arshad, 48 (kanan) dan Azril Ianiati Bashah, 45 (kiri) dinobatkan sebagai pelajar terbaik menerima Anugerah Pengarah dan Pelajar Cemerlang Kejuruteraan Mekanikal dalam majlis Konvokesyen Politeknik Kota Bharu (PKB) ke 37 dan Kolej Komuniti Negeri Kelantan 2024. FOTO Nor Amalina Alias

Kota Bharu: Dikenali sebagai pendiam dan malu-malu, seorang gadis 'introvert' dinobatkan sebagai pelajar terbaik sempena Konvensyen Politeknik Kota Bharu (PKB) Ke-37 dan Kolej Komuniti Negeri Kelantan 2024.

Nurul Bazlina Zainudin, 22 menerima Anugerah Pengarah PKB dan Anugerah Kecemerlangan Akademik dan Kokurikulum Jabatan Kejuruteraan Mekanikal.

Gadis berasal dari Jitra, Kedah itu mendapat anugerah dekan setiap semester dengan purata Nilai gred kumulatif (CGPA) 3.82.

Katanya, lepasan kedua-dua institusi itu mendapat kepercayaan hampir 19,000 majikan dalam industri seperti perbankan, sektor elektronik dan industri minyak dan gas dalam dan luar negara.

Nurul Bazlina berkata, ketika ini dia menyambung pengajian di Universiti Malaysia Perlis (UniMAP) dalam bidang kejuruteraan pertanian.

"Rahsia kejayaan saya adalah peruntukan dua jam sehari untuk belajar setiap hari, manakala hari minggu saya tambah sehingga empat jam sehari.

"Saya memang minat kejuruteraan dan berharap dapat jadi pensyarah dalam bidang ini," katanya ketika ditemui di majlis konvokesyen itu di Dewan Jubli Perak, PKB, Kok Lanas di sini, hari ini.

Anak kepada pasangan, Zainudin Mat Arshad, 48 dan Azril Isniati Bashah, 45, itu berkata, walaupun pendiam dan malu-malu, sepanjang pengajiannya di PKB dia cuba untuk mengaktifkan diri dalam bidang sukan dan kegiatan akademik lain.

Katanya, antara kenangan yang tidak boleh dilupakan adalah ketika menyertai program ASEAN Regional Convention (ARC) yang turut disertai pelajar daripada luar negara seperti Filipina, Indonesia, Brunei dan Thailand.

Katanya, pekerjaan ibu bapanya sebagai pembantu perawatan kesihatan turut menjadi pendorong untuk dia meneruskan cita-cita bagi membela nasib keluarga.

Sementara itu, ibu Bazlina, Azril Isniati berkata, anak kedua daripada tiga beradik itu memang 'ulat buku' dan suka menyendiri di dalam biliknya.

Katanya, anaknya juga amat menggemari bacaan novel dan berbangga dengan kejayaan yang dicapai Bazlina yang membawa pulang plak, wang tunai dan sijil sebagai pelajar terbaik PKB tahun ini.

Dalam majlis konvokesyen itu, seramai 1,497 graduan daripada PKB dan Kolej komuniti menerima sijil tamat pengajian yang berlangsung bermula hari ini sehingga 22 Ogos ini.

**Disiarkan pada: 18 Ogos 2024**

**Sumber :** [Gadis 'introvert' muncul pelajar terbaik Politeknik Kota Bharu](#) (Sila klik)